



册府元龜  
卷之五  
至七



1 3  
849  
5





冊府元龜  
849  
5



冊府元龜

淮南李嗣京叅閱

西極文翔鳳訂正

豫章黃國琦較釋

帝王部 五

創業

易曰雲雷屯君子以經綸孟子曰天下溺援之以道  
其創業之謂乎神農以前爲而不有功成不居故無  
得而稱焉炎帝下衰諸侯放恣蚩尤貪暴害於有衆  
黃帝修德治兵順天行罰諸侯百姓咸所欣戴遂應



土德之運而有天下非夫聰明睿智神武而不殺者其孰能與於此商周開基其義益顯湯誥曰有夏昏德民墜塗炭天乃錫王勇知表正萬邦泰誓曰予有臣三千惟一心商罪貫盈天命誅之故云為淵毆魚者獺也為叢毆爵者鷓也為湯武毆民者桀與紂也漢魏以降豪傑竝馳莫不英謀沈斷雄圖遠馭乘時以建義任能以協力撥亂反正與民休息天人合符乃膺大寶有以知天造草昧王業之艱難也

黃帝初受國於有熊氏軒轅之丘因以為名軒轅之時

神農氏世衰易稱庖犧氏沒神農氏作是為炎帝教民耕農故號曰神農諸侯

相侵伐暴虐百姓而神農氏弗能征於是軒轅乃習

用干戈以征不享諸侯咸來賓從而蚩尤最為暴莫

能伐蚩尤古天子孔子三朝記曰蚩尤庶人之貪者炎帝欲侵諸侯諸侯咸

歸軒轅軒轅乃修德振兵治五氣五行之氣執五種執樹也詩

云執之荏菽周禮曰穀宜五種鄭玄曰五種黍稷菽麥稻也撫萬民度四方度四方而

安撫教熊羆貔貅羆虎以與炎帝戰於阪泉之野阪泉

地名也三戰然後得其志蚩尤作亂不用帝命於是

黃帝乃徵師諸侯與蚩尤戰於涿鹿之野涿鹿山名在涿郡又

曰在遂禽殺蚩尤皇覽曰蚩尤冢在東平郡壽張縣關鄉城中高七丈民嘗十月祀之

有赤氣出如疋絳帛名為蚩尤旗肩髀冢在山陽郡鉅野縣重聚大小與闕冢等傳言黃帝與蚩尤戰于



逐鹿之野黃帝殺之身體異處故別葬之而諸侯咸尊軒轅為天子代神

農氏是為黃帝天下有不順者黃帝從而征之平者

去之披山通道披他本一作破字蓋當為披披者旁其邊之謂也披語成合今世然古今

不必同也未嘗寧居東至于海登九山九作凡在瑯琊朱虛縣及岱

宗西至於空峒山名在隴右登鷄頭南至于江登熊湘南

至于召陵登熊山湘山在長沙益陽縣北逐葷粥匈奴傳曰唐虞以上有土戎獫狁葷粥居

於北蠻合符釜山而邑于涿鹿之阿遷徙往來無嘗處

以師兵為營衛

帝舜年二十以孝聞三十而堯問可用者四嶽咸薦

舜曰可於是堯乃以二女妻舜以觀其內使九男與

處以觀其外舜居媯汭內行彌謹堯二女不敢以貴

驕事舜親戚甚有婦道堯九男皆益篤一年而所居

成聚二年成邑三年成都堯乃試舜五典百官皆治

昔高陽氏有才子八人蒼舒隕數搏戲大臨能降庭堅仲容叔達世得其

利謂之八凱凱和也高辛氏有才子八人伯奮仲堪叔獻季仲伯虎

仲熊叔豹季狸世謂之八元元善也此十六族者世濟其美不

隕其名至於堯堯未能舉舜舉八凱使王后土君治九土

之空以揆百事莫不時序舉八元使布五教於四方父

義母慈兄友弟恭子孝內平外成昔帝鴻氏有不才

子帝鴻黃帝也不才其苗裔讎塊也掩義隱賊好行凶慝天下謂之



渾沌少皞氏金天氏也有不才子毀信惡忠崇飾惡言天

下謂之窮奇謂共工氏也其行窮而好奇顓頊氏有不才子不可

教訓不知話言天下謂之檇杌檇杌頑凶無儔匹之貌謂鯀也此三

族世憂之至于堯堯未能去縉雲氏姜姓炎帝之苗裔也有不

才子貪於飲食冒于貨賄天下謂之饕餮天下惡之

比之四凶舜賓于四門乃流四凶之族遷于四裔四裔

之地去王城四千里以禦魍魎魍魎人面獸身四足好惑人山林異氣所生以為人害於

是四門辟言毋凶人也舜入於大麓烈風雷雨不迷

堯乃知舜之足授天下使舜攝行天子政巡狩堯三

年喪畢讓堯子丹朱而天下歸舜遂踐天子位

夏禹初為司空與益后稷奉帝堯命命諸侯百姓興

人徒以傅土傳作敷土也行山表木定高山大川定其差秩祀禮

所視也名山大川五嶽四瀆之屬禹傷先人父鯀功之不成受誅鯀治

水九年而功弗成舜極之乃勞身焦思居外十三年過家門不敢

入陸行乘車水行乘船泥行乘橈橈或作范形如山箕隨行泥上山

行乘橦一作橋謂以鐵如錐頭長半寸施之履下以山不蹉跌也左準繩右規

矩左右言嘗用也載四時所行不違四時之宜也以開九州通九道陂

九澤度九山令益予衆庶稻可種卑濕命后稷予衆

庶難得之食食少調有餘相給以均諸侯禹乃行相

地宜所有以貢及山川之便利東漸於海西被于流



沙朔南暨朔北方也聲教訖於四海于是帝錫禹玄圭以

告成功於天下天下於是太平始舜薦禹於天為嗣

舜三年喪畢禹辭辟舜之子商均于陽城今潁川人陽城是

下諸侯皆去商均而朝禹禹遂即天子位

殷湯初為夏方伯得專征伐葛伯不祀湯始伐之孟子

曰湯居亳與葛伯為隣地里志曰葛今梁國寧陵之葛鄉湯曰予有言人視水見

形視民知治不伊尹曰明哉言能聽道乃進君國子

民為善者皆在主官勉哉勉哉湯曰汝不能做命予

人罰殛之無有攸赦作湯征當是時夏桀為虐政淫

蕞而諸侯昆吾氏為亂湯乃與師率諸侯伊尹從湯

湯自把鉞以伐昆吾遂伐桀湯曰格汝眾庶來女悉

聽朕言匪台小子台我也敢行舉亂有夏多罪予惟聞

女眾言夏氏有罪予畏上帝不敢不正不敢不正桀之罪而誅之

今夏多罪天命殛之今女有眾女曰我君不恤我眾

舍我嗇事而割政奪民農功而為割剝之政女其曰有罪其奈何

夏王率止眾力率奪夏國桀之君臣相率遏止眾力使不得事農相率割剝夏

之邑有眾率怠不和眾民相率怠惰不和同曰是何時喪予

與女皆亡尚書大傳曰桀云天之有日猶吾之有民日有亡哉日亡吾亦亡矣夏德若

兹今朕必往爾尚及予一人致天之罰予其大理女

尚書理字作賚賚賜也女母不信朕不食言女不從誓言予則



孥戮女無有攸赦以告令師作湯誓於是湯曰吾甚

武號曰武王詩曰武王載旆有虔秉鉞毛萇曰武王湯也桀敗於有娥之

塗桀奔於鳴條夏師敗績湯遂伐三瓊俘厥寶玉三

國名桀走保之今義伯仲伯作典寶二臣作典寶一篇言國之嘗寶

也湯既勝夏欲遷其社不可欲變置社稷而後世無及句龍者故不可而止

作夏社言夏社不可遷之義伊尹報一云伊尹報政於是諸侯畢服湯

乃踐天子位平定海內

周文王為西伯崇侯虎譖於紂紂乃囚西伯於羑里

因天之徒患之乃求有莘氏美女驪戎之文馬有熊

九駟他奇怪物因商嬖臣費仲而獻之紂紂大悅曰

此一物足以釋西伯况其多乎乃赦西伯賜之弓矢

斧鉞使得征伐西伯乃獻雒西之地以請去炮烙之

刑紂許之西伯陰行善諸侯皆來決平於是虞芮之

人地里志虞在河東太陽縣芮在馮翊臨晉縣有獄不能決乃如周入界

耕者皆讓畔民俗皆讓長虞芮之人未見西伯皆慙

相謂曰吾所爭周人所恥何往為祇取辱耳遂還俱

讓而去諸侯聞之曰西伯乃受命之君明年伐犬戎

山海經曰有人人面獸身名曰犬戎明年伐密須密須氏姑姓之國安定陰密縣是明

年敗耆國一作殷之祖伊聞之懼以告帝紂紂曰不

有天命乎是何能為明年伐邠邠城在野王縣西北音于明年伐



崇侯虎而作豐

豐在京北鄆縣東有靈臺去長安南數十里

自岐山而徙

都豐時文王之道被于南國美化行乎江漢之域無

思犯禮求而不可得也

紂時淫風徧于天下維江漢之域先受文王之教化

有漢廣之詩言德廣及也文王之化行乎汝墳之國

婦人能閔其君子猶勉之以正也

言此婦人被文王之化厚事其君子

故有汝墳之詩言其道化行也衰亂之俗微貞信之

教興疆暴之男不能侵陵貞女

衰亂之俗微貞信之教興者此殷之末世

周之盛德當文王與紂之時

故有行露之詩周南之國化文王之

政在位皆節儉正直德如羔羊

羔羊之化在位卿大夫競相從化皆如羔

羊故有羔羊之詩召南之國被文王之化男女得以

及時故有標有梅之詩天下大亂疆暴相陵遂成淫

風被文王之化雖當亂世猶惡其無禮故有野有死

麋之詩鵲巢之化行人倫既正朝廷既治天下純被

文王之化則庶類蕃殖蒐田以時仁如騶虞則王道

成也故有騶虞之詩文王之用師率殷之叛國以事

紂養是闇昧之君以佐其惡是周道大興而天下太

歸往矣故酌之詩曰於鑠王師遵養時晦時純熙矣

是用大介

鑠美遵率養取晦昧也介助也

太子發立是為武王武王

卽位太公望為師周公旦為輔召公畢公之徒左右

王師脩文王緒業九年武王上祭于畢

畢文王墓地名也東



觀兵至于盟津譙周云史記武王十一年東觀兵十二年尅紂為文王木主

載以軍中車武王自稱太子發言奉文王以伐不敢

自專乃告司馬司徒司空諸節諸節謂諸受持節有司也齊粟信

哉予無知以先祖有德臣小子受先功一云予小子受先公功

畢立賞罰以定其功遂興師師尚父號曰總爾眾庶

與爾舟楫後至者斬武王渡河中流白魚躍入于王

舟中魚者介鱗之物兵象也白者殷家之正色言殷之兵眾與周之象也武王俯取以

祭既渡有火自上復于下至于王屋流為烏其色赤

其聲魄王屋王所居屋流行也魄然安定意也書說云烏有孝名武王率父大業故烏瑞蔡赤者

周之正色也是時諸侯不期而會盟津者八百諸侯皆曰

紂可伐矣武王曰女未知天命未可也乃還師歸居

二年聞紂昏亂暴虐滋甚殺王子比干囚箕子太師

庇少師強抱其樂器而犇周於是武王徧告諸侯曰

殷有重罪不可以不畢伐一作滅乃遵文王遂率戎車

三百乘虎賁三千人虎賁勇士稱也若虎賁言其勇也甲士四萬五

千人以東伐紂十一年十二月戊午師畢渡盟津諸

侯咸會曰孳孳無怠武王乃作太誓告于眾庶今殷

王紂乃用其婦人之言自絕于天毀壞其三正動逆天

人離邊其王父母弟王父母弟祖父母之族必言母弟舉親者言之也乃斷

棄其先祖之樂乃為淫聲用變亂正聲怡悅婦人故

八

冊子三

帝王部



今予發維共行天罰勉哉夫子

夫子丈夫之稱

不可再不可

三二月

一作正此建丑之月殷之正月周之二月也

甲子昧爽

昧冥爽明早旦也

武王朝至於商郊牧野乃誓

癸亥夜陳甲子朝誓之

武王左杖

黃鉞右秉白旄

鉞以黃金飾斧左手杖鉞示無事以於誅右手把旄示有事於教令

麾曰遠矣西土之人嗟我有國家君

冢大也

司徒司馬

司空亞旅師氏

亞次旅衆大夫也其位次卿師氏大夫官以兵守門

千夫長百

夫長

師率卒率

及庸蜀羌髳微纘彭濮人

八國皆蠻夷戎狄羌在西蜀予

微在巴蜀纘彭在西北庸濮在江漢之南纘一作盧

稱爾戈

稱舉也

比爾干立爾

予予其誓王曰古人有言牝雞無晨牝雞之晨惟家

之索

索盡也婦人知外事唯代雄鳴則家盡也

今殷王紂維婦人言是用

自棄其先祖肆祀不答

肆祭名答報也

昏棄其家國遺其王

父母弟不用乃維四方之多罪逋逃是崇是長是信

是使

言紂棄其賢臣而尊長逃亡罪人信用之也

俾暴虐于百姓以茲究

于商國今予發維共行天之罰今日之事不過六步

七步乃止齊焉

今日戰士不過六步七步乃比相齊言當旋進一心也

夫子勗

哉不過于四伐五伐六伐七伐乃止齊焉

伐謂擊刺也少則四

五多則六七以爲例也

勉哉夫子尚桓桓如虎如罴如豺如離

此訓與螭同

于商郊不禦克犇以役西土

禦疆禦謂疆暴也克殺也不得

暴殺紂師之犇走者當以爲周之役也

勉哉夫子爾所不勉其於爾躬

有戮誓已諸侯兵會者車三千乘陳師牧野帝紂聞



武王來亦發兵七十萬人距武王武王使師尚父與

百夫致師周禮環人掌致師鄭玄曰致師者致其必戰之志也古者將戰先陳勇力之士犯敵

焉春秋傳曰楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致

師者左射以蔽代御執轡御下兩馬掉鞍而還攝叔曰吾聞致師者右入壘折馘執俘而還皆行其所聞

而以大卒馳帝紂師帝一作商紂師雖眾皆無戰之心

欲武王亟入紂師皆倒兵以戰以開武王武王馳之

紂兵皆潰畔紂紂走反入登于鹿臺之上蒙衣其珠

玉自燔于火而死武王持大白旗以麾諸侯諸侯畢

拜武王武王乃揖諸侯諸侯畢從武王至商國商國

百姓咸待於郊於是武王使群臣告語商百姓曰上

天降休商人皆再拜稽首武王亦答拜入至紂死所

武王自射之三發而後下車以輕劍擊之以黃鉞斬

紂頭縣太白之旗已而致紂之嬖妾二女二女皆經

自殺武王又射三發擊以劍斬以玄鉞司馬法曰夏

曰玄鉞用鐵不磨礪縣其頭小白之旗武王已乃出復軍其明

日除道修社及商紂宮及期百夫荷罕旗以先蔡邕

曰前驅有九旒雲罕東京賦曰雲罕九旒薛綜曰旒旗名武王弟叔振鐸奉陳嘗

軍周公旦把大鉞畢公把小鉞以夾武王散宜生太

顛閎夭皆執劍以衛武王既入立于社南大卒之左

右畢從毛叔鄭奉明水周禮曰司烜氏以鑑取水於

月鄭玄曰鑑鏡屬也取月之

冊符元區 帝王部 卷之五



水欲得陰陽之潔氣 衛康叔封布茲 茲者藉席之名 諸侯病曰負茲

召公奭贊采師尚父牽牲尹佚筮祝曰殷之末孫季

紂殄廢先王明德侮蔑神祇不祀昏暴商邑百姓其

章顯聞于天上帝於是武王再拜稽首曰膺大命

革殷受天明命武王又再拜稽首乃出封商紂子祿

父殷之餘民武王為殷初定未集乃使其弟管叔鮮

蔡叔度相祿父治殷已而命召公釋箕子之囚命畢

公釋百姓之囚表商容之閭命南宮括散鹿臺之財

發鉅橋之粟以賑貧弱萌隸命南宮括史佚展九鼎

保玉 保玉 命閎夭封比干之墓命宗祝享祠于軍乃

作寶

罷兵西歸行狩記事作武成 武功成也 封諸侯班賜宗彝

作分殷之器物

漢高祖初為泗上亭長為縣送徒驪山 秦始皇葬驪山故郡國送

徒士 徒多道亡自度比至皆亡之到豐西澤中夜皆

解縱所送徒 縱放也 曰公等皆去吾亦從此逝矣 逝往也

徙中壯士願從者十餘人秦二世元年秋七月陳涉

起蕘 音機縣名 屬沛國 至陳自立為楚王郡縣多殺長吏以

應涉九月沛令欲以沛應之掾主吏蕭何曹參 參為掾何

為王 曰君為秦吏今欲背之沛子弟恐不聽願君召

諸亡在外者可得數百人因以劫眾 劫謂威脅之 眾不敢



不聽乃令樊噲召高祖高祖之眾已數百人矣於是樊噲從高祖來沛令後悔恐其有變乃閉城城守

守其城也欲誅蕭曹蕭曹恐踰城保高祖保安也就高祖以自安高

祖乃書帛射城上與沛父老曰天下同苦秦久矣今

父老雖為沛令守諸侯竝起今屠沛屠謂破取城邑誅殺其人如屠

六畜沛今其誅令擇可立立之以應諸侯即室家完

不然父子俱屠無為父老乃帥子弟共殺沛令開城

門迎高祖欲以為沛令高祖曰天下方擾諸侯竝起

今置將不善一敗塗地謂肝腦塗地也吾非敢自愛恐能薄

能才也本獸名能行鹿足堅中強力故人有才者皆為能也不能完父兄子弟此

大事願更擇可者蕭曹皆文吏自愛恐事不就後秦

種族其家謂誅及種族也盡讓高祖諸父老皆曰平生所聞

劉季奇怪當貴卜筮之莫如劉季最吉高祖數讓眾

莫肯為高祖乃立為沛公祠黃帝祭出尤於沛廷而

釁鼓釁血祭也凡殺牲以血祭者皆為釁於是少年豪吏如蕭曹樊噲

等皆為收沛子弟得三千人是月項梁與兄子羽起

吳田儋與從弟榮橫起齊自立為齊王韓廣自立為

燕王魏咎自立為魏王二世二年十月十月秦正月也沛公

攻胡陵屬山陽方輿音房類亦山陽還守豐秦泗州監平將

兵圍豐泗州今沛郡秦時御史監郡平其名也三日出與戰破之令雍



齒守豐十一月沛公引兵之薛秦泗州守壯兵敗於

薛秦時郡置守尉監此泗州有監有守壯其名也走至戚屬東海沛公左司馬

得殺之得司馬名也沛公還軍亢父亢音抗父音甫屬任抗城至方與

十二月雍齒反為魏守豐魏人周市略地豐沛雍齒不欲屬沛公故為魏守

沛公攻之不克正月東陽寧君秦嘉寧君秦嘉二人寧姓時號為君

立景駒為楚王在留留縣名沛公往從之道得張良遂

與俱見景駒請兵以攻豐時章邯從陳別將從謂進計也

司馬尼將兵北定楚地尼古夷字章邯司馬也屠相至碭相縣名碭

兵聚留二月攻碭三日拔之收碭兵得六千人與故

合九千人三月攻下邑拔之下邑縣名還擊豐不下四月

項梁擊殺景駒秦嘉止薛沛公往見之項梁益沛公

卒五千五大夫將十人五大夫第九爵名沛公還引兵攻豐

拔之雍齒奔魏六月沛公如薛如往也與項梁共立楚

懷王孫心為楚懷王六國為秦所并楚最無罪故求其後立之以祖謚為號順民望

也沛公攻亢父章邯圍田榮於東阿沛公與項梁共

救出榮大破章邯東阿田榮歸沛公項羽追北北敗也

至城陽攻屠其城軍濮陽東復與章邯戰又破之章

邯復振振起也振迅而起守濮陽環水沛公項羽去攻定陶

八月田榮立田儋子市為齊王定陶未下沛公與項



羽西略地至雍丘與秦軍戰大破之斬三川守李繇  
 還攻外黃外黃未下章邯擊項梁九月沛公項羽方  
 攻陳畱聞梁死士卒恐乃與將軍呂臣引兵而東徙  
 懷王自盱台都彭城台音怡呂臣軍彭城東項羽軍彭  
 城西沛公軍碭後九月即閏九月懷王并呂臣項羽軍自  
 將之以沛公為碭郡長封武安侯將碭郡兵初懷王  
 與諸將約先入定關中者王之當是時秦兵彊嘗乘  
 勝逐北諸將莫利先入關不以入關為利言畏秦也獨羽怨秦破  
 項梁奮勢願與沛公西入關懷王諸老將皆曰項羽  
 為人慄悍禍賊慄疾悍勇好為禍害而殘賊也嘗攻襄城襄城無噍

類

噍音碎笑反言無有活而噍食者也

所過無不殘滅且楚數進取前

陳王項梁皆敗

陳王陳涉也

不如更遣長者扶義而西扶助

也亦作杖

告諭秦父兄秦父兄苦其主久矣今誠得長者

往毋侵暴空可下項羽不可遣獨沛公素寬大長者  
 卒不許羽而遣沛公西收陳王項梁散卒乃道碭至

陽城與扛里

二縣名扛音江

攻秦軍壁破其二軍三年十月

沛公攻破東郡尉於武成

尉郡都尉也本謂之郡尉至景帝時改曰都尉十

二月沛公引兵至栗

沛郡縣

遇剛武侯

應邵注云楚懷王將剛侯陳武

又云魏將柴武也孟康皆非之類師古云史失其名姓唯識爵號臣欽若等曰剛武未詳官爵名氏奪

其軍四千人并之與魏將皇欣武蒲軍合攻秦軍破



之二月沛公從碭北攻昌邑遇彭越越助攻昌邑未  
下三月攻開封未拔西與秦將楊熊會戰白馬縣名屬東

郡又戰曲遇東曲音丘羽反大破之楊熊走之滎陽

二世使使斬之以徇四月南攻潁川屠之因張良遂

略韓地時趙別將司馬卬卬音五剛反方欲渡河入關沛

公乃北攻平陰絕河津南戰維陽東軍不利從轅轅

至陽城攻軍中馬騎六月與南陽太守齧戰犍東犍縣

名也齧音又破之畧南陽郡南陽守走保城守宛沛

公用其舍人陳恢言受齧降封為殷侯引兵西無不

下者至丹水高武侯鯁襄侯王陵降還攻朝陽遇番

君別將梅銷番音婆銷音呼玄反與偕攻析酈一縣名析今內鄉酈故菊潭

皆降所過毋得鹵掠秦民喜遣魏人甯昌使秦八月

沛公攻武關趙高殺二世使人來約分王關中沛公

不許又擊破秦峽關軍漢元年十月張倉傳云高祖以十月至霸上

故因秦以十月為歲首沛公至霸上秦王子嬰素車白馬係頸

以組封皇帝璽符節降軹道旁軹道亭名諸將或言誅秦

王沛公曰始懷王遣我固以能寬容且人已服降殺

之不祥乃以屬吏遂西入咸陽欲止宮休舍樊噲張

良諫乃封秦重寶財物府庫還軍霸上蕭何盡收秦

丞相府圖籍文書十一月召諸縣豪傑曰父老苦秦



苛法久矣誹謗者族偶語者棄市偶對也吾與諸侯約先入關中者王之吾當王關中與父老約法三章耳殺人者死傷人及盜抵罪餘悉除去暴秦法吏民皆按堵如故凡吾所以來為父兄除害非有所侵暴毋恐且吾所以軍霸上待諸侯至而定要束耳乃使人與秦吏行至縣鄉邑告諭之秦民大喜爭持牛羊酒食獻享軍士沛公讓曰倉粟多不欲費民民又益喜惟恐沛公不為秦王或說沛公曰秦富十倍天下地形疆今聞章邯降項羽羽號曰雍王王關中即來沛公恐不得有此可急使守函谷關母內諸侯軍稍徵

關中兵以自益距之沛公然其計從之十二月項羽果率諸侯兵欲西入關關門閉聞沛公已定關中羽大怒使黥布等攻破函谷關遂至戲下亞夫范增說羽曰沛公居山東時貪財好色今聞其入關珍物無所取婦女無所幸此其志不小吾使人望其氣皆為龍成五色此天子氣急擊之勿失於是饗士旦日合戰沛公用項伯張良謀來謝得免項羽使報懷王懷王曰如約謂令沛公王關中項羽怒陽尊懷王為義帝自立為西楚霸王更立沛公為漢王王巴蜀漢中漢王怒羽之背約欲攻之丞相蕭何諫乃止夏四月諸侯罷



戲下各就國羽使卒三萬人從漢王楚子諸侯人之  
 慕從者數萬人從杜南入蝕中蝕音力入漢中川谷名張良辭  
 歸韓漢王遂至褒中因說漢王燒絕棧道以備諸侯  
 盜兵且示項羽無東意漢王既至南鄭諸將及士卒  
 皆歌謳思東歸多道亡還者韓信為治粟都尉亦亡  
 去蕭何追還之因薦於漢王曰必欲爭天下非信無  
 可與計事者於是漢王齋戒設壇場拜信為大將軍  
 問以計策信對曰項羽背約而王君王於南鄭是遷  
 也吏卒皆山東之人日夜企而望歸及其鋒而用之  
 可以有大功天下已定民皆自寧不可復用不如決

策東向因陳羽可圖三秦易并之計漢王大悅遂聽  
 信策部署諸將留蕭何收巴蜀租給軍糧食五月漢  
 王引兵從故道出襲雍雍王邯迎擊漢陳倉雍兵敗  
 還走戰好畤又大敗走廢丘漢王遂定雍地東如咸  
 陽引兵圍雍王廢丘而遣諸將略地項羽聞漢王并  
 關中而齊梁畔之羽大怒乃以故吳令鄭昌為韓王  
 距漢令蕭公角擊彭越越敗角兵時張良徇韓地遺  
 羽書曰漢欲得關中如約即止不敢復東羽以故無  
 西意而北擊齊九月漢王遣將軍薛歐王吸出武關  
 因王陵兵從南陽迎太公呂后於沛羽聞之發兵距



之陽夏不得前二年十月項羽使九江王布殺義帝  
 於郴十一月漢王還都雒陽使諸將畧地二月癸未  
 令民除秦社稷立漢社稷三月為義帝發喪袒而大  
 哭發使告諸侯擊楚之殺義帝者四月田榮弟橫收  
 得數萬人立榮子廣為齊王羽雖聞漢東旣擊齊欲  
 遂破之而後擊漢漢王以故得却五諸侯兵恒山河南魏韓  
 也殷東伐楚到外黃彭越將三萬人歸漢漢王拜越為  
 魏相令定梁地漢王遂入彭城收其貨賂美人日置  
 酒高會羽乃從蕭晨擊漢軍而東至彭城日中大破  
 漢軍早擊之至日中大破漢軍皆走追之穀泗水二水皆在沛郡彭城地

漢軍皆南走山走趣也楚又追擊至靈璧東睢水上睢音

雖漢軍卻為楚所擠擠排也又音子奚反多殺漢卒十餘萬皆

入睢水睢水為之不流殺人多填於水中漢王乃與數十騎

遁去太公呂后間求漢王問行而求之反遇楚軍楚軍與

歸羽嘗置軍中呂后兄周呂侯將兵居下邑漢王從

之稍收士卒軍碭蕭何發關中老弱未傅者詣軍傳著

也音附言著於各籍給公家徭役也韓信亦收兵與漢王會漢兵復大

振與楚戰滎陽南京索間破之築甬道屬河以取敖

倉粟魏王豹謁歸視親疾至則絕河津反為楚六月

漢王還櫟陽八月如滎陽以韓信為左丞相與曹參

冊府元龜 帝王部 卷之五 十八



灌嬰俱擊魏九月信等虜魏王豹定魏地信使人請  
兵三萬願以北舉燕趙東擊齊南絕楚糧道漢王與  
之三年十二月黥布歸漢漢王俱收兵至成皐項羽  
數侵奪甬道漢軍乏食四月漢王請和割滎陽以西  
為漢羽欲聽之歷陽侯范增曰漢易與耳今不取後  
必悔之羽乃急圍滎陽漢王患之用陳平計以黃金  
四萬斤間疏楚君臣項羽果疑范增增大怒而去五  
月漢將軍紀信詐為漢王出降以誑楚軍故得出滎  
陽至成皐自成皐入關收軍復軍成皐八月臨河南  
鄴軍小脩武欲復戰郎中鄭忠說止漢王高壘深塹

勿戰漢王聽其計使盧綰劉賈將卒二萬人騎數百

渡白馬津入楚地佐彭越燒楚積聚所畜軍糧復擊

破楚軍燕郭西燕縣名古南燕國攻下睢陽外黃十七城四

年十月漢王項羽相與臨廣武之間而語羽欲與漢

王獨身挑戰漢王數羽數責其罪也曰吾始與羽俱受命

懷王曰先定關中者王之羽負約王我於蜀漢罪一

也羽矯殺卿子冠軍自尊罪二也卿子時人相褒尊之意猶言公子也

時宋義為上將軍故言冠軍矯詐也羽當以救趙還報而擅劫諸侯兵

入關罪三也懷王約入秦無暴掠羽燒秦宮室掘始

皇帝冢收私其財罪四也又彊殺秦降王子嬰罪五



也詐坑秦子弟新安二十萬王其將

章邯等為王也

罪六也

皆王諸將善地而徙逐故主令臣下爭畔罪七也出

逐義帝彭城自都之奪韓王地并王梁楚多自與罪

八也使人陰殺義帝江中罪九也夫為人臣而殺其

主殺其已降為政不平主約不信天下所不容大逆

無道罪十也吾以義兵從諸侯誅殘虐使刑餘罪人

擊公

言輕賤也

何苦乃與公挑戰羽大怒伏弩射中漢王

漢王因馳入成臯羽為高俎置太公其上

高俎凡之上也俎者

所以薦肉示欲亨之故置俎上

告漢曰今不急下吾亨太公漢王曰

吾與若俱北面受命懷王約為兄弟吾翁即汝翁

翁謂

父也

必欲亨迺翁幸分我一杯羹

迺亦汝也古者以杯盛羹今之側杯有兩

耳者是也

羽怒欲殺之項伯曰天下事未可知且為天下

者不顧家雖殺之無益但益怨耳羽從之十一月漢

王西入關至櫟陽留四日復入廣武八月項羽食盡

韓信又進兵擊楚漢使侯公說羽乃與漢約中分天

下割洪溝以西為漢

洪溝在滎陽東南二十里

以東為楚九月歸

太公呂后羽解而東歸五年十月漢王追項王至陽

夏南上軍與齊王韓信魏相國越期會擊楚十一月

劉賈入楚地圍壽春十二月圍羽垓下羽夜聞漢軍

四面皆楚歌知盡得楚地羽與數百騎走以是兵大



敗灌嬰追斬羽東城楚悉定獨魯不下漢王引天下兵欲屠之為其守節禮義之國乃持羽頭示其父兄魯乃降詔曰兵不得休八年萬民與苦甚也

與讀曰預言相干與

也今天下事畢其赦天下殊死已下

魏太祖初為典軍較尉後漢中平六年董卓既廢弘農王而立獻帝京都大亂表太祖為驍騎將軍欲與計事太祖乃變易姓名間行東歸卓歸遂殺太后及弘農王太祖至陳留散家財合義兵將以誅卓冬十

二月始起兵已吾

已吾縣名屬陳留郡世語曰陳留

有衆五千

初平元年正月後將軍袁術冀州牧韓馥豫

州刺史孔伷兖州刺史劉岱河內太守王康渤海太守袁紹陳留太守張邈東郡太守橋瑁山陽太守袁遺濟北相鮑信俱同時起兵衆各數萬討董卓紹問太祖曰若事不輯則方面何所可據公曰足下意以為何如紹曰吾南據河北阻燕代兼夷狄之衆南向以爭天下庶可以濟乎公曰吾任天下之智力以道御之無所不可推紹為盟主於是太祖行奮武將軍二月卓聞兵起乃徙天子都長安卓留屯雒陽遂焚宮室是時紹屯河內邈岱瑁遺屯酸棗術屯南陽佃屯潁川馥屯鄴卓兵彊紹等莫敢先進太祖曰舉義



兵以誅暴亂大衆已合諸君何疑向使董卓聞山東兵起倚王室之重據二周之險東向以臨天下雖以無道行之猶足爲患今焚燒宮室劫遷天子海內震動不知所歸此天亡之時也一戰而天下定矣不可失也遂引兵西將據成臯邈遣將衛茲分兵隨太祖到滎陽汴水遇卓將徐榮與戰不利士卒傷死甚多太祖爲流矢所中所乘馬被創從弟洪以馬與太祖得夜遁去榮見太祖所將兵少力戰盡日謂酸棗未易攻也亦引兵還太祖到酸棗諸軍兵十餘萬日置酒高會不圖進取太祖責讓之因爲謀曰諸軍聽吾

計使渤海引河內之衆臨孟津酸棗諸將守成臯據

敖倉塞轅轅大谷全制其險使袁將軍率南陽之軍

臣欽若等曰  
袁將軍紹也

軍丹析入武關以震三輔皆高壘深壁勿與戰益爲疑兵示天下形勢以順誅逆可立定也

今兵以義動持疑而不進失天下之望竊爲諸君恥之邈等不能用太祖兵少乃與夏侯惇等詣揚州募兵刺史陳溫丹陽太守周昕與兵四千餘人還到龍亢士卒多叛至銍建平復收兵得千餘人進屯河內劉岱與橋瑁相惡岱殺瑁以王肱領東郡太守袁紹與韓馥謀立幽州牧劉虞爲帝太祖拒之二年七月



黑山賊于毒白繞睢固等

睢音申  
隨反

十餘萬衆略魏郡

東郡王眩不能禦太祖引兵入東郡擊白繞於濮陽破之袁紹因表太祖爲東郡太守三年春擊睢固又大破之青州黃巾衆百萬入兗州殺任城相鄭遂轉入東平劉岱與戰爲賊所殺鮑信與州吏萬潛等至東郡迎太祖領兗州牧遂進兵擊黃巾於壽張東破之追至濟北乞降冬受降卒三十餘萬男女百餘萬口收其精銳者號爲青州兵四年春太祖軍鄆城袁術與紹有隙荊州牧劉表斷術糧道術引兵入陳留屯封丘使將劉祥屯長垣太祖擊祥術救之與戰大

破之興平元年夏使荀彧程昱守鄆城太祖征陶謙拔五城遂略地至東海會張邈與陳宮叛迎呂布郡縣皆應布攻鄆城不能下西屯濮陽太祖圍之濮陽大姓田氏爲反間太祖得入城燒其東門示無反意及戰軍敗布騎得太祖而不知是問曰曹操何在太祖曰乘黃馬走者是也布騎乃釋太祖而追黃馬者門火猶盛太祖突火而出復進軍攻之與布相守百餘日九月太祖還鄆城布到乘氏爲其縣人李進所破二年春太祖襲定陶濟陰太守吳資保南城未拔會布至又擊破之建安元年七月楊奉韓暹以天子



還雒陽太祖遂至雒陽衛京都天子假太祖節鉞錄  
 尚書事雒陽殘破董昭等勸太祖都許九月車駕出  
 轅轅而東以太祖為大將軍封武平侯二年九月袁  
 術侵陳太祖東征破之術走渡淮三年九月東征呂  
 布屠彭城獲其相侯諧進至下邳布自將騎逆擊大  
 破之追至城下用荀攸郭嘉計決泗沂水以灌城月  
 餘布將宋憲等執陳宮舉城降生擒布宮皆殺之四  
 年春張楊將楊醜殺楊睦固又殺醜以其眾屬袁紹  
 屯射犬射犬地名太祖進軍臨河因使楊故長史薛洪河  
 內太守繆尚留守自將兵北迎袁紹太祖遂濟河圍

射犬洪尚率眾降五年十月破袁紹於官渡乃上言  
 曰大將軍鄴侯袁紹前與冀州牧韓馥立故大司馬  
 劉虞刻作金璽遣故任長畢瑜詣虞為說命錄之數  
 又紹與臣書曰可都鄆城當有所立擅鑄金銀印孝  
 廉計吏皆往詣紹從弟濟陰太守敘與紹書云今海  
 內喪敗天意實在我家神應有徵當在尊兄南兄臣  
 下欲使卽位南兄言以年則北兄長以位則北兄重  
 便欲還璽會曹操斷道紹宗族累世受國重恩而凶  
 逆無道乃至如此輒勒兵馬與戰官渡乘聖朝之威  
 得斬紹大將淳于瓊等紹眾大潰棄軍渡河遂收其



輜重圖書珍寶虜其衆六年九月南征劉備備聞太  
祖自行走奔劉表七年五月表紹死小子尚代九月  
太祖征之連戰尚敗八年三月攻其郭大破之尚夜  
遁九年四月尚將沮鵠守邯鄲沮音菹太祖擊拔之十  
年正月攻袁譚平冀州四月黑山賊張燕率其衆十  
餘萬降十一年正月征高幹平壺關十二年七月引  
軍出盧龍塞外使張遼爲先鋒虜衆大潰斬蹋頓及  
名王已下胡漢降者二十餘萬口十三年七月征劉  
表表卒其子琮代屯襄陽九月太祖到新野琮遂降  
十七年正月天子命太祖贊拜不名入朝不趨劔履

上殿十八年五月天子使御史大夫郗慮持節策命  
爲魏公七月始建魏社稷宗廟二十一年五月進爵  
爲王二十五年正月文帝卽位追尊武皇帝廟號太  
祖

文帝太祖太子後漢建安十六年爲五官中郎將副  
丞相二十二年爲魏太子二十五年嗣位爲丞相魏  
王改元延康元年五月馮翊山賊鄭甘王炤率衆降  
六月辛亥治兵于東郊庚午遂南征七月孫權遣使  
奉獻蜀將孟達率衆降武都民王楊僕率種人內附  
居漢陽郡十一月遂受漢禪



冊府元龜

冊府元龜

淮南李嗣京參閱

西極文翔鳳訂正

豫章黃國琦較釋

帝王部 六

創業第二

晉宣帝司馬氏後漢京兆尹防之子

臣欽若等曰自防以下事迹具

帝王部系門

建安中魏太祖為漢丞相辟文學掾轉東曹

屬又轉為主簿從討張魯又從征孫權破之魏國建

遷太子中庶子文帝即王位以帝為丞相長史封河



津亭侯反魏受漢禪以帝爲尚書黃初二年遷侍中尚書右僕射文帝疾篤帝與曹真等竝受顧命輔政明帝卽位改封舞陽侯孫權圍江夏遣其將諸葛瑾張霸并攻襄陽帝督諸軍討權走之進擊敗瑾斬霸并首級千餘遷驃騎將軍太和元年蜀降將孟達領新城太守連吳固蜀潛圖中國帝發書喻之達猶豫不決帝潛軍進討倍道兼行八日到其城下八道攻之旬有六日達甥鄧賢將李輔等開門出降遂斬達首傳京師四年加大將軍大都督假黃鉞與曹真伐蜀帝自西城斫山開道水陸竝進泝沔而上至于朐

朐

胸音蠢朐音如允反地名

拔其新豐縣軍次丹口遇雨班師五

年蜀將諸葛亮寇天水乃使帝西屯長安都督雍梁二州諸軍事統車騎將軍張郃後將軍費曜征蜀進次漢陽與亮相遇亮退追至祁山亮屯鹵城據南北二山斷水爲重圍帝攻拔其圍亮宵遁追擊破之俘斬萬計青龍二年亮又率衆十餘萬出斜谷壘于郿之渭水南原天子遣征蜀護軍秦朗督步騎二萬受帝節度帝與亮相會于積石臨原而戰亮不得進還于五丈原帝遣奇兵犄亮之後斬五百餘級獲生口千餘降者六百人會亮死其部將楊儀魏延爭權儀斬



延并其衆帝欲乘隙而進有詔不許三年遷太尉蜀將馬岱入寇帝遣將軍牛金擊走之景初二年率胡遵等步騎四萬伐公孫文懿于遼東與賊營相逼會霖潦大水平地數尺三軍恐欲移營帝令軍中敢有言徙者斬都督令史張靜犯令斬之軍中乃定尋戰而克之明帝末與大將軍曹爽並受遺詔輔少主齊王卽帝位遷帝侍中持節都督中外諸軍錄尚書事與大將軍曹爽各統兵三千人共執朝政爽欲使尚書奏事先繇已乃言於天子徙帝爲大司馬朝議以爲前後大司馬累薨於位乃加大傅入殿不趨贊拜

不名劔履上殿正始二年吳人入寇帝督諸軍南征車駕送出津陽門帝以南方暑濕不宜持久使輕騎挑之然不敢動於是休戰士簡精銳募先登申號令示必攻之勢吳軍夜遁走追至三洲口斬獲萬餘人收其舟船軍資而還天子遣侍中嘗侍勞軍于宛嘉平元年正月天子謁高陵爽兄弟皆從是日太白襲月帝乃奏永寧太后廢爽兄弟有司劾黃門張當并發爽與何晏等反事乃收爽兄弟及其黨誅之二月天子以帝爲丞相三年八月薨長子師次子昭繼爲大將軍輔政晉國建追尊宣王武帝受禪追尊號曰



宣皇帝景帝宣帝長子魏景初中拜散騎嘗侍累遷中護軍宣帝之誅曹爽也深謀祕策與帝潛畫初帝陰養死士三千散在人間至是一朝而集衆莫知其所出事平以功封長平鄉侯加衛將軍及宣帝薨議者咸云伊尹旣卒伊陟嗣事天子命帝以撫軍大將軍輔政嘉平四年遷大將軍加侍中持節都督中外諸軍錄尚書事命百官舉賢良明少長卹窮獨理廢滯四海傾注朝野肅然或有請改易制度者帝曰不識不知順帝之則詩人之美也三祖典制所宜遵奉自非軍事不得妄有改革五年五月吳太傅諸葛恪

圍新城帝使鎮東將軍毋丘儉揚州刺史文欽等距破之正元元年正月天子與中書令李豐后父光祿大夫張緝黃門監蘇鑠永寧署令樂敦冗從僕射劉寶賢等謀以太嘗夏侯玄代帝輔政帝密知之使舍人王羨以車迎豐豐見迫隨羨而至帝數之豐知禍及因肆惡言帝怒遣勇士以刀鑠築殺之逮捕玄緝等皆夷三族三月乃諷天子廢皇后張氏天子以玄緝之誅深不自安而帝亦慮難作潛謀廢立乃密諷永寧太后下令廢天子爲齊王遣使迎高貴鄉公於元城立之公以帝爲相國增邑至四萬戶帝固辭相



國二年正月毋丘儉文欽舉兵作亂矯太后令移檄郡國爲壇盟於西門之外各遣子四人質於吳以請救二月儉欽帥衆六萬渡淮而西帝會公卿謀征討計朝議多謂可遣諸將擊之太嘗王肅及尚書傅嘏中書侍郎鍾會勸帝自行帝統中軍步騎十餘萬以征之倍道兼行召三方兵大會于陳許之郊斬儉傳首京師欽遂奔吳淮南平閏月帝疾篤使弟昭總統諸軍晉國旣建追尊景王武帝受禪上尊號曰景皇帝文帝景帝母弟帝魏景初三年封新城侯正始初爲雒陽典農中郎將轉散騎嘗侍大將軍曹爽伐蜀

以帝爲征蜀將軍副夏侯玄出駱谷次于興平勸玄旋軍以爲後圖還拜議郎蜀將姜維寇隴右征西將軍郭淮自長安距之以帝爲安西將軍持節屯關中爲諸軍節度淮攻維別將句安於趨久而不決帝乃進據長城南趣駱谷以疑之維懼退保南鄭安軍絕援率衆來降轉安東將軍持節鎮許昌及大軍討王陵帝督淮北諸軍事帥師會于項假金印紫綬蜀將姜維又寇隴右揚聲欲攻狄道以帝行征西將軍次長安維燒營而去會新平羗胡叛帝擊破之遂耀兵靈州北虜震讐叛者悉降高貴鄉公立以參定策進



封高都侯毋丘儉文欽之亂大軍東征帝兼中領軍留鎮雒陽及景帝疾篤帝自京都省疾拜衛將軍景帝薨天子命帝鎮許昌尚書傅嘏帥六軍還京師帝用嘏及鍾會策自帥軍而還至雒陽進位大將軍加侍中都督中外諸軍錄尚書事輔政劔履上殿帝固辭不受甘露元年正月加大都督六月進封高都公地方七百里加之九錫又固辭不受二年五月鎮東大將軍諸葛誕殺揚州刺史樂綝以淮南作亂遣子覲爲質於吳以請救七月帝奉天子及皇太后東征徵兵青徐荆豫分取關中遊軍皆會淮北師次於項

又進軍丘頭吳使文欽等將三萬人救誕三年正月誕欽等出攻長圍諸軍逆擊走之初誕欽內不相協會欽計事與忤誕手刃殺欽欽子鴛攻誕不克帝使諸將攻而拔之斬誕夷三族四月歸京師天子命改丘頭曰武丘以旌武功五月進封晉公加九錫進位相國帝九讓乃止景元元年四月天子以帝三世宰輔政非已出情不能安又慮廢辱將臨軒召百僚而行放黜五月戊子夜使冗從僕射李昭等發甲於凌雲臺召侍中王沉散騎嘗侍王業尚書王經出懷中黃素詔示之戒嚴俟旦沉業等馳告於帝帝召護軍



賈充爲之備天子知事泄帥左右攻相府稱有所討太子舍人成濟抽戈犯蹕帝斬濟夷其三族與公卿議立嘗道鄉公爲帝四年天子乃申前命以太原等十郡封帝爲晉公加九錫遣征西將軍鄧艾伐蜀於是徵四方之兵十八萬使艾自狄道攻姜維於沓中雍州刺史諸葛緒自祁山軍於武街絕維歸路鎮西將軍鍾會帥前將軍李輔征蜀護軍胡烈等自駱谷襲漢中艾帥萬餘人自陰平踰絕險至江油破蜀將諸葛瞻於綿竹進軍維縣遂降劉禪又命晉公以相國總百揆於是上節傳去侍中大都督錄尚書之號

咸熙元年三月進爵爲王增封并前二十郡二年八

月薨謚曰文王武帝受禪追尊號曰文皇帝

武帝文帝長子仕魏累遷中護軍封新昌鄉侯晉國建立爲世子拜撫國大將軍開府副相國咸熙二年五月爲晉王太子八月嗣相國晉王位下令寬刑宥罪撫衆息役十一月初置四護軍以統城外諸軍十一月遂受魏禪

一月遂受魏禪

後魏道武皇帝拓拔氏昭成皇帝嫡孫

臣欽若等曰昭成以上事

起立悉具帝王帝系門

始六歲居昭成喪僞秦苻堅使劉庫仁

劉衛辰分攝國事南部夫人長孫嵩盡將故民南依



庫仁帝轉幸獨孤部其後七年十月苻堅敗於淮南  
是月庫仁為慕容文等所殺以其弟春攝國部九年  
庫仁子顯殺春而代之乃將謀逆

臣欽若等曰將謀逆謂將殺道武

商人王霸知之履帝足於眾中帝乃馳還是時故大  
人梁蓋盆子六春為顯謀主盡知其計密使部人穆  
崇馳告帝乃陰結舊臣長孫捷元他等幸賀蘭部顯  
使人求帝不及明年正月戊申帝即代王位于牛川  
建元登國元年復以長孫嵩為南部大人以叔孫普  
雒為北部大人班敘勲勞各有差二月幸定襄之盛  
樂息眾課農三月劉顯臣欽若等曰劉顯即劉庫仁之子是也自善無

南走馬邑其族奴真率部來降四月改稱魏王五月  
車駕東幸陵石護佛侯部帥侯辰乙弗部帥代題叛  
走諸將請追之帝曰侯辰等世修職役雖有小愆宜  
且忍之當今草創人情未一愚近者固應趨趨不足  
追也七月己酉車駕還盛樂代題復以部落來降旬  
有數日亡奔劉顯帝使其孫倍斤代領部落是月劉  
顯弟肺泥率騎掠奴真部落既而率以來降初帝叔  
父窟咄為苻堅徙于長安因隨慕容永以為新興太  
守八月劉顯遣弟亢泥迎窟咄以近隨之來逼南境  
於是諸部騷動人心願望帝左右于桓等與諸部人



謀為逆以應之事泄誅造謀五人餘悉不問帝慮內  
 難乃北踰陰山幸賀蘭部阻山為固遣行人安同長  
 孫賀使于慕容垂以徵師垂遣使朝貢并令其子賀  
 麟率步騎以隨同等十月賀麟軍未至而寇已前逼  
 於是北部大人叔孫普羅等十三人及諸烏丸亡奔  
 衛辰帝自弩山遷幸牛川屯于延水南出代谷會賀  
 麟於高柳大破窟咄窟咄奔衛辰殺之帝悉收  
 其眾十二月慕容垂遣使朝貢奉帝西單于印綬封  
 上谷王帝不納是歲慕容垂僭稱皇帝於中山自號大燕符不死符登自立於壘泉姚萇稱皇帝於長安自號大秦慕容垂為部下所殺慕容永僭立也二年六月征劉顯於

馬邑南追至彌臯大破之顯南奔慕容永盡收其部  
 落三年五月北征庫莫奚陸月大破之獲其四部雜  
 畜十餘萬七月庚申庫莫部帥鳩集遺散夜犯行宮  
 帝縱騎撲討盡殺之十二月西征至女水討解如部  
 大破之四年正月襲高車諸部落二月至女水討叱  
 突隣部皆大破之五年三月西征次鹿津海襲高車  
 表紇部四月幸意辛山討賀蘭紇突隣紇奚諸部落  
 皆大破之九月討吐奴部於囊典河十月討高車豆  
 陳部於狼山亦皆破之六年二月遣九原公儀陳留  
 公虔等臣欽若等曰儀虔二公皆宗室西討黠弗部破之七月衛辰



遣子貞力鞬出稠陽塞侵及黑城九月襲五原屠之  
十月北征蠕蠕追及之於大磧南林山下大破之十  
一月真力鞬寇南部帝討之大破其軍於鐵岐山自  
五原金津南度河次其所居悅跋城衛辰父子奔遁  
擒斬之自河以南諸部悉平八年三月西征侯呂隣  
部四月至苦水大破之八月南征薛于部帥太悉佛  
於三城會其先出擊曹覆帝乘虛屠其城獲其子女  
珍寶徙其民而還皇始元年七月左司馬許謙上書  
勸進尊號帝始建天子旌旗初建臺省置百官封公  
侯將軍刺史太守尚書郎已下悉用文人天興元年

六月丙子詔有司議定國號羣臣曰昔周秦以前世  
君所生之土有國有家及王天下卽承爲號自漢以  
來罷侯置守時無世繼其應運而起者皆不繇尺土  
之資今國家萬世相承啓基雲代臣等以爲若取長  
遠應以代爲號詔曰昔朕遠祖摠御幽都控制遐國  
雖踐王位未定九州逮于朕躬處百代之季天下分  
裂諸華乏主民俗雖殊撫之在德故躬率六軍掃平  
中土凶逆蕩除遐邇率服宜仍先號以爲魏焉布告  
天下咸知朕意閏十一月左丞相驃騎大將軍魏王  
儀及諸王公卿士等上表勸進卽皇帝位帝三讓乃



許之

後周太祖文帝宇文氏德皇帝之子

德皇帝事迹金具帝王帝系門

後魏明帝孝昌二年燕州亂太祖始以統軍從爾朱榮征之先是北海王顥奔梁梁人立爲魏主令率兵入雒魏孝莊帝出居河內以避之榮遣賀拔岳討顥仍迎孝莊帝太祖與岳有舊乃以別將從岳及孝莊帝反正以功封寧都子邑三百戶遷鎮遠將軍步兵較尉万俟醜奴作亂關右孝莊帝遣爾朱天光及岳等討之太祖遂從岳入關先鋒破僞行臺尉遲菩薩等及平醜奴定隴右太祖功居多遷征西將軍金紫

光祿大夫增邑三百戶加直閣將軍普泰二年爾朱天光東拒齊神武留弟顯壽鎮長安秦州刺史侯莫陳悅爲天光所召將軍衆東下賀拔岳知天光必敗欲留悅共圖顯壽而計無所出太祖謂岳曰今天光未有二心若以此事告之恐其驚懼然悅雖爲主將不能制物若先說其衆必人有留心進失爾朱之期退恐人情變動乘此說悅事無不遂岳大喜卽令太祖入悅軍說之悅遂不行乃相率襲長安令太祖輕騎爲前鋒策顯壽怯懼聞諸軍將至必當東走恐其遠遁乃倍道兼行顯壽果已東走追至華山擒之太



昌元年關西大行臺賀拔岳以太祖爲左丞領岳府司馬加散騎嘗侍事無巨細皆委決焉齊神武旣破爾朱遂專朝政太祖請往觀之旣至并州齊神武矚岳軍事太祖占對雄辨齊神武以爲非嘗人欲留之太祖詭陳忠款乃得反命遂星夜就道齊神武果遣追之至關不及太祖還謂岳曰高歡非人臣也逆謀所以未發者憚公兄弟耳然凡欲立大功正社稷未有不因地勢總英雄而能克成者也侯莫陳悅本實庸材遭逢際會遂叨任委旣無憂國之心亦不爲高歡所忌但爲之備圖之不難今費也投控弦之騎不

下一萬夏州刺史解拔彌俄定勝兵之士三千餘人及靈州刺史曹泥竝恃其僻遠嘗懷異望河西流民紇豆陵伊利等戶口富實未奉朝命今若移軍近隴扼其要害示之以威懷之以德卽收其士馬以實吾軍西輯玄羗北撫沙塞還軍長安正輔魏室此桓文舉也岳大悅復遣大祖詣關請事密陳其狀魏帝深納之加大祖武衛將軍還令報岳遂引軍西次平涼謀於其衆曰夏州隣接寇賊須加綏撫安得良刺史以鎮之衆皆曰宇文左丞卽其人也岳曰左丞吾之左右手也如何可去沉吟累日乃從衆議於是表太



祖爲使持節衛將軍夏州刺史太祖至州伊利望風  
款附而曹泥猶通使於齊神武魏永熙三年春正月  
岳欲討曹泥遣都督趙貴至夏州與太祖計事太祖  
曰曹泥孤城阻遠未足爲憂侯莫陳悅怙衆密邇貪  
而無信必將爲患願早圖之岳不聽遂與悅俱討泥  
二月至于河曲岳果爲悅所害其士衆散還平涼唯  
大都督趙貴率部曲收岳屍還營三軍未有所屬諸  
將以都督寇維年最長相與推維以總兵事維素無  
雄畧威令不行乃謂諸將曰維智能本闕不宜統御  
近者迫於群議權相攝領今請避位更擇賢才於是

趙貴言於衆曰元帥忠公盡節暴於朝野勲業未就  
菴罹凶酷豈唯國喪良宰固亦衆無所依必欲糾合  
同盟復讐雪恥須擇賢者總統諸軍舉非其人則大  
事難集雖欲立忠建義其可得乎竊觀宇文夏州英  
姿不世雄謨冠時遠邇歸心士卒用命加以法令齊  
肅賞罰嚴明真足恃也今若告喪必來赴難因而奉  
之卽大事集矣諸將皆稱善乃命赫連馳至夏州告  
太祖曰侯莫陳悅不顧盟誓棄恩背德賊害忠良群  
情憤惋控告無所公昔居管轄恩信著聞今無小無  
大咸願推奉衆之思公引日成歲願勿稽留以慰衆



望也太祖將赴之夏州吏民咸泣請曰聞悅今在永  
維去平涼不遠若已有賀拔公之衆則圖之實難願  
且停留以觀其變太祖曰悅旣害元帥自應乘勢直  
據平涼而反趨趙屯兵永維吾知其無能爲也且難  
得易失者時也不俟終日者機也今不早赴將恐衆  
心自離都督彌姐元進規欲應悅密圖太祖事發斬  
之太祖乃發輕騎馳赴平涼時齊神武遣長史侯景  
招引岳衆太祖至安定遇之謂景曰賀拔公雖死宇  
文泰尚存卿何爲也景失色對曰我猶箭耳隨人所  
射安能自裁景於此卽還太祖至平涼哭岳甚慟將

士且悲且喜曰宇文公至無所憂矣于時魏孝武帝  
將圖高歡聞岳被害遣武衛將軍元毗宣旨慰勞追  
岳軍還維陽毗到平涼會諸將已推太祖侯莫陳悅  
亦被勅追還悅旣附高歡不肯應召太祖謂諸將曰  
侯莫陳悅枉害忠良復不應詔命此國之大賊豈可  
容之乃命諸軍戒嚴將以討悅及元毗還太祖表於  
魏帝曰臣前以故關西大都督臣岳竭誠奉國橫罹  
非命三軍喪氣朝野痛惜都督寇維等啣冤茹憾志  
雪讐恥以臣昔同幕府苦賜要結臣便以今月十四  
日輕來赴軍當發之時已有別表旣爲衆情所逼權



掌兵事詔召岳軍人入京此乃爲國良策但高歡之衆已至河東侯莫陳悅猶在永雒在此軍士多是關西之人皆戀鄉邑不願東下今逼以上命悉令赴闕悅躡其後歡邀其前首尾受敵其勢危矣臣殞身王事誠所甘心恐敗國殄人所損更大乞少停緩更思後圖徐事誘導漸就東引太祖志在討悅而未測朝旨且兵未集假此爲詞因與元毗及諸將刑牲盟誓同獎王室魏帝詔太祖曰賀拔岳旣殞士衆未有所歸卿可爲大都督卽相統領知欲漸就東下良不可言今亦徵侯莫陳悅士馬入京若其不來朕當親自

致罰宜體此意不過淹留太祖表曰侯莫陳悅違天逆理酷害良臣自以專戮罪重不恭詔命阻兵永雒強梁秦隴臣以大宥旣班忍抑私憾頻問悅及都督可朱渾元等歸闕早晚而悅竝維繫使人不敢反報觀其指趣勢必別圖臣正爲此未敢自拔兼順衆情乞少停緩太祖乃與悅書責之曰頃者正光之末天下沸騰塵飛河朔霧塞荆沔故將軍賀拔公攘袂勃起志寧寓縣援戈南指拯皇靈於已墜擁旌西邁濟百姓於淪胥西顧無憂繫公是賴勳伐茂隆遂征關右此乃行路所知不藉一二談也君實名微行薄本



無遠量故將軍行遷喬之志篤彙征之理乃申啓朝  
廷薦君爲隴右行臺朝議以君功名闕然未之許也  
遂煩煩請謁至於再三天子難違上將便於聽許是  
亦遐邇共知不復煩之翰墨縱使木石爲心猶當知  
感況在生靈安能無愧加以王室多故高氏專權主  
上虛心寄隆晉鄭君復與故將軍同受密旨屢結盟  
約期於畢力共戡時難而貌恭心狠妬勝嫉賢口血  
未乾七首已發協黨固賊共危本朝孤恩負誓有覲  
面目豈不上畏於天下慙於地吾以弱才猥當藩牧  
蒙朝廷拔擢之恩故荷將軍國士之遇間問之日魂

守驚馳便陳啓天朝蹙來奔赴察情所推遂當戎重  
比有勅旨召吾還闕亦有別詔命君入朝雖操行無  
間而年齒已宿今日進退唯君是視君若督率所部  
自山隴東邁吾亦摠勒師徒北道還闕共追蕪藺之  
迹同慕寇賈之風如其首鼠兩端不時奉詔專戮違  
旨國有嘗刑枕戈坐甲指日相見幸圖利害無貽噬  
臍悅旣知太祖謀已詐爲詔書與秦州刺史万俟普  
撥令與悅爲黨撥普撥疑之封詔以呈太祖太祖表  
之曰臣自奉詔總平涼之師責重憂深不遑啓處訓  
兵秣馬唯思竭力前以人戀本土侯莫陳悅窺窬進



退量度且宜任此今若召悅授以境內官臣列旆東  
轅匪朝伊夕朝廷若以悅堪爲邊扞乞處以瓜涼一  
藩不然則終致猜虞於事無益初原州刺史史歸爲  
岳所親任河曲之變反爲悅守悅遣其黨王伯和成  
次安將兵二千人助歸鎮原州太祖遣都督侯莫陳  
崇率輕騎一千襲歸擒之并獲次安伯和等送於平  
涼太祖表崇行原州事万俟普撥又遣其將北干保  
維領二千騎來從軍三月太祖進軍至原州衆軍悉  
集論以討悅之意士卒莫不懷憤太祖乃表曰臣聞  
誓死酬恩覆宗報主人倫所急赴蹈如歸自大都督

臣岳歿後臣頻奉詔還闕秣馬戒途志不俟旦直以  
督將已下咸稱賀拔公視我如子今讐恥未報亦何  
面目以處世間若得一雪冤酷萬死無恨且悅外附  
強臣內違朝旨臣今上思逐惡之志下遂節士之心  
冀仗天威爲國除害小違大順實在茲辰克定之後  
伏待斧鉞四月引兵上隴留兄子遵爲都督鎮原州  
太祖軍令嚴肅秋毫無犯百姓大悅識者知其有成  
軍出木峽關大雨雪平地二尺太祖知悅怯而多猜  
乃倍道兼行出其不意悅果疑其左右有異志者左  
右亦不自安衆遂離貳聞大軍且至退保畧陽留一



萬餘人據守永維太祖至永維命圍之城降太祖卽  
率輕騎數百趨畧陽以臨悅軍悅大懼乃召其部將  
議之皆曰此鋒不可當勸悅退保上邽以避之時南  
秦州刺史李弼亦在悅軍乃間道遣使請爲內應其  
夜悅出軍中自驚潰將卒或相率來降太祖縱兵奮  
擊大破之虜獲萬餘人馬八千匹悅與其子弟及麾  
下數十騎遁走太祖曰悅本與曹泥應接不過走向  
靈州乃令原州都督遵邀其前都督賀拔穎等追其  
後遵至牽屯山追及悅斬之太祖入上邽悅府庫財  
物山積皆以賞士卒毫釐無所取左右竊一銀鏤甕

以歸太祖知而罪之卽剖賜將士衆大悅時高歡已  
有異志故魏帝深仗太祖乃徵二千騎鎮東雍州助  
爲聲援仍令太祖引軍而東太祖遣大都督梁禦率  
騎步五千鎮河渭合口爲圖河東之計遂入雍州魏  
帝進太祖侍中驃騎大將軍開府儀同三司關西大  
都督畧陽縣公尋尚書授僕射關西大行臺時魏帝  
方圖齊神武太祖乃傳檄方鎮曰蓋陰陽通用盛衰  
相襲苟當百六無問三五皇家創曆陶鑄蒼生保安  
四海仁育萬物運距季末屯沴屢起隴冀騷動燕河  
狼顧雖靈命重起蕩定有期而乘釁之徒因生羽翼



賊臣高歡器識庸下出自輿阜罕聞禮義直以一介鷹犬効力戎行靦冒恩私遂階榮寵不能竭誠盡節專挾姦回乃勸爾朱榮行茲篡逆及榮以專政伏誅世隆以凶黨外叛歡苦相敦勉令取京師又勸吐萬兒復與弒雲暫立建明以令天下假推普泰欲竊威權金歸廢斥俱見酷害於是稱兵河北假討爾朱復通表奏云取讒賊旣行廢黜遂將篡弒以人望未改恐愕獲交及乃求宗室權允人心天方與魏必將有主翊戴聖明誠非歡力而歡阻兵安忍自以爲功廣布腹心跨州連郡端揆禁閹莫非親黨皆行貪虐窳

窳生人而舊將名臣正人直士橫生瘡痍動挂網羅故武衛將軍伊琳清貞剛毅禁旅攸屬直閣將軍鮮于康仁忠亮驍傑爪牙斯在歡收而戮之曾無聞奏司空高乾是其黨與每相影响謀危社稷但以姦志未從恐先洩漏乃密白朝廷使殺高乾方哭對其弟稱天子橫戮孫騰任祥歡之心脅竝使入居樞近伺國間隙知歡逆謀將發相繼逃歸歡益加撫待亦無匡自然歡入雒之始本有姦謀令親人蔡雋作牧河濟厚相恩贍以爲東道主人故關西大都督清水公賀拔岳勲德隆重興亡攸寄歡好亂樂禍深相忌毒



乃與侯莫陳悅陰圖陷害幕府已受律專征便即討  
戮歡知狀已露稍懷旅拒遂遣蔡雋拒伐令竇泰佐  
之又遣侯景等云向白馬輔世珍等徑趣石濟高隆  
之疋婁昭等屯據壺關韓軌之徒擁衆蒲坂於是上  
書天子數論得失訾毀乘輿威侮朝廷藉此微庸異  
茲大寶谿壑可盈禍心不測或言徑赴荆楚開疆於  
外或言分詣伊維取彼讒人或言欲來入關與幕府  
決戰今聖明御運天下清夷百寮師師四奧來暨人  
盡忠良誰爲傾側而歡威福自巳生是亂階緝搆南  
箕指鹿爲馬包藏凶逆伺我神器是而可忍孰不可

忍幕府折衝宇宙親當受朕銳師百萬鼓騎千群裹  
糧坐甲唯敵是俟義之所在糜軀匪怯况類有詔書  
班告天下稱歡逆亂徵兵致伐今便分命將帥應機  
進討或趣其要害或襲其窟宅電繞蛇擊霧合星羅  
而歡違負天地毒被人鬼乘此掃蕩易同俯拾歡若  
渡河稍逼宗廟則分命諸將直取并州幕府躬自東  
轅電赴伊維若固其巢穴未敢發動亦命群帥百道  
俱前輾裂賊臣以謝天下其州鎮郡縣率土黎人或  
州鄉冠冕或勳庸世濟竝宜捨逆歸順立効軍門封  
賞之科已有別格凡百君子可不勉歟七月魏帝從



雒陽率輕騎入關太祖備儀衛奉迎謁見東陽驛乃奉命都長安披草萊立朝廷軍國之政咸取太祖決焉仍加授大將軍雍州刺史兼尚書令進封郡公尚馮翊長公主拜駙馬都尉閏十二月魏孝武帝大漸太祖與群公定策尊立南陽王寶炬爲嗣是爲文帝大統元年進都督中外諸軍錄尚書事封安定郡王太祖固讓改封郡公三年正月東魏寇龍門屯軍蒲坂造三道浮橋度河又遣其將竇泰趣潼關太祖縱兵擊破之盡俘其衆斬泰首高歡徹橋而遁是年八月丁丑太祖率李弼獨孤信梁禦趙貴于謹若干惠

怡峰劉亮王德侯莫陳崇李遠達奚武等十二將至潼關太祖乃誓於師曰與爾有衆奉天威誅暴亂惟爾衆士整爾甲兵戒爾戎事無貪財以輕敵無暴民以作威用命則有賞不用命則有戮爾衆士其勉之于謹徇地至盤豆降東魏將高叔禮及戍卒一千戊子至弘農于時連雨太祖乃率諸軍冒雨攻之庚戌城潰斬陝州刺史李徽伯虜其戰士八千擒將高干竝送長安於是宜陽邵郡皆來歸附十月壬辰破高歡於沙苑斬六千餘級降者二萬餘人歡夜遁追至河上復大克獲前後虜其卒七萬留其甲士二萬餘



悉縱歸收其輜重兵甲獻俘長安還軍渭南於是所徵諸州兵始至乃於戰所令當時兵士人種柳一株以旌武功魏帝進太祖柱國大將軍四年七月東魏遣其將侯景庫狄干高敖曹韓軌可朱渾元莫多婁貸文等圍獨孤信於雒州八月庚寅太祖至穀城莫多婁貸文可朱渾元來逆臨陣斬貸文元單騎遁免悉虜其衆遂進軍瀍東景等北據河橋南屬邙山爲陣與諸軍合戰斬高敖曹及其儀同李猛西兗州刺史宋顯等虜其甲士萬五千赴河死者萬數六年春侯景出三鵝將侵荊州太祖遣開府李弼獨孤信各

率騎五千出武關景乃退還夏茹度河至夏州太祖召諸軍屯沙苑以備之八年冬高歡侵汾絳圍王璧九年春度河據邙山十二年春侯景侵襄州九月高歡圍王璧太祖皆破走之十三年正月歡卒子澄嗣與侯景有隙景舉河南十六州東附七月景叛歸于梁十四年正月進授太祖太師十五年六月梁竟陵郡守孫暲舉郡來附時侯景圍建業司州刺史柳仲禮帥兵赴援及景克建業仲禮還司州率衆來寇暲以郡叛十一月太祖遣開府楊忠率兵與行臺僕射長孫儉討之攻克隨郡忠進圍仲禮長史馬岫於安



陸十六年正月擒仲禮悉擄其衆馬岫以城降十七年三月魏文帝終太子嗣位太祖以冢宰摠百揆十月太祖遣大將王雄出子午伐上津魏興大將軍達奚武出散關伐南鄭明年去年號稱元年是年春王熊平上津魏興以其地置東梁州夏四月達奚武圍南鄭月餘梁州刺史宜農侯蕭循以州降武執循還長安二年三月遣大將軍魏安公尉遲迥率衆伐梁武陵王蕭紀於蜀夏四月太祖勒銳騎三萬西踰隴度金城河至姑臧吐谷渾震懼遣使獻其方物五月蕭紀潼州刺史楊乾運以州降引迥軍向成都七月

太祖自姑臧至于長安八月克成都劔南平三年春魏帝有怨言太祖與公卿定議廢帝尊立齊王廓是爲恭帝元年七月梁元帝遣使請舊圖以定疆界又連結於齊言辭悖慢太祖曰古人有言天之所棄誰能興之其蕭繹之謂乎十月壬戌遣柱國于謹中山公護大將軍楊忠韋孝寬等步騎五萬討之十一月癸未師濟於漢中山公護與楊忠率銳騎先屯其城下據江津以備其逸丙申謹至江陵列營圍守辛亥進攻城其日克之擒梁元帝殺之并虜其百官及士民以歸沒爲奴婢者十萬餘其免者二百餘家立蕭



晉爲主居江陵爲魏附庸三年正月行周禮建六官以太祖爲太師九月太祖有疾十月乙亥大漸殂于雲陽宮十二月閔帝受魏禪追尊爲文王廟曰太祖武成元年追尊爲文皇帝

閔帝太祖第三子魏恭帝三年三月命爲安定公世子四月拜大將軍十月嗣位大冢宰十二月魏帝以岐陽之地封帝爲周公遂受魏禪

册府元龜

册府元龜

淮南李嗣京叅閔

西極文翔鳳訂正

豫章黃國琦較釋

帝王部

七

創業第三

隋高祖文帝楊氏武元皇帝之子

臣欽若等曰武元以上事迹具帝王

帝系初仕後周爲大將軍襲爵隋國公周武帝聘高

祖長女爲皇太子妃齊王憲言於周帝曰普六茹堅相貌非嘗臣每見之不覺自失恐非人下請早除之



帝曰此止可爲將耳建德中率水軍三萬破齊師於河橋明年從武帝平齊進位柱國與宇文憲破齊任城王高楷於冀州除定州總管轉亳州總管宣帝卽位以后父徵拜上柱國大司馬大象二年五月出爲揚州總管將發暴有足疾不果行周宣帝晏駕時靜帝幼冲未能親理政事內史上大夫鄭譯御正下大夫劉昉以高祖皇后之父衆望所歸遂矯詔引高祖入總朝政都督內外諸軍事周氏諸王在藩者高祖恐其生變稱趙王招將嫁女於突厥爲詞以徵之丁未發喪庚戌周帝拜高祖假黃鉞左丞相百官總已

而聽焉以正陽宮爲相府以鄭譯爲長史劉昉爲司馬具置寮佐宣帝時刑政苛酷羣心惶駭莫有生意至是高祖大崇惠政法令清簡躬履節儉天下悅之六月趙王招陳王純越王盛代王達滕王道竝至于長安是月雍州牧畢王賢及陳趙等五王以天下之望歸於高祖因謀作亂高祖執賢斬之寢趙王等之罪因詔五王劍履上殿入朝不趨用安其心相州總管尉遲迥自以重臣宿將志不能平遂舉兵東下趙魏之士從者若流旬日之間衆至十餘萬又宇文冑以榮州石懸以建州席毗以沛郡毗弟文羅以兗州



皆應於迥迥遣子質于陳以請援高祖命上柱國鄖國公韋孝寬討破之傳首闕下餘黨悉平初迥之亂也鄖州總管司馬消難據州響應淮南州縣多同之命襄州總管王誼討之消難奔陳荆郢羣蠻乘釁作亂命亳州總管賀若誼討平之先是上柱國王謙爲益州總管旣見幼主在位政繇高祖遂起巴蜀之衆以興復爲辭高祖方以東夏山南爲事未遑致討謙進兵屯劍閣陷始州至是乃命行軍元帥上柱國梁睿討平之傳首闕下巴蜀阻險人好爲亂於是更開平道毀劍閣之路立銘垂誠焉是月誅趙王招越王

盛九月周帝詔授高祖大丞相罷左右丞相之官十月誅陳王純十一月誅代王達滕王道十二月進爵爲王靜帝大定元年二月壬子加九錫遂受周禪開皇元年三月庚子詔曰自古帝王受終革代建侯錫爵多與運遷朕膺錄受圖君臨海內載懷浚革事有不同然則前帝後王俱在兼美立功立事爵賞仍行苟利於時其致一揆何謂物我之異無計今古之殊其前代品爵悉可依舊

唐高祖神堯皇帝李氏太祖景皇帝之子

臣欽若等曰景帝以

上事迹具帝

襲封唐國公大業中爲衛尉少卿遼東

冊府元龜

帝王部

卷之七



之役高祖於懷遠鎮督運糧知楊玄縱兄弟逃還密表聞奏煬帝始知玄感起逆乃班師於是慰勞高祖諭以親親之意元弘嗣先在弘化留守卽斛斯政親戚乃遣高祖馳執弘嗣代爲留守關右十三都兵皆受徵發高祖御衆寬簡結納英豪歷居中外皆樹恩德繇是四海之士多歸心焉于時絳郡賊柴保昌等有衆八萬煬帝令戶部尚書樊子蓋擊之子蓋深溝高壘不敢決戰有來歸首者不問多少必坑之繇是莫敢降賊徒日盛屯軍在外連年不能尅煬帝令高祖代總其衆高祖與賊頻戰每挫其鋒有來者引置

左右摧赤心待之人人自安願効死力其餘賊黨相謂曰我輩本無逆心徒以政令嚴苛懼歿爲盜耳前後首者爲子蓋所殺窮無所歸今唐公與人無隔疎遠意坦如也我輩知不死矣遂相率歸首前後至者數萬餘人賊散走他郡時突厥犯塞煬帝令高祖與馬邑太守王仁恭率衆備邊會虜寇馬邑仁恭以衆寡不敵有懼色高祖謂之曰今主上遐遠孤城絕援若不死戰難以圖全於是親選精騎二千出爲遊軍居處飲食隨逐水草一同於突厥見虜候騎但馳騁畋獵示若輕之及與虜相遇則犄角置陣選善射者



爲別隊持滿以待之虜莫能測不敢決戰因縱奇兵擊走之獲其特勒所乘駿馬斬首千餘級煬帝復以高祖爲太原留守遣武賁郎將王威虎牙郎將高君雅二人爲副會高陽賊帥歷山飛等衆號十萬來寇太原將軍慕容羅暉潘長文俱爲所敗賊鋒益盛高祖率步騎六千以擊之相遇於同過水上賊陣彌亘十餘里埃塵漲天戰士大懼莫不股慄高祖神色自若令王威率大衆居前所有旌旗鼓角及輜重悉配之高祖與麾下數百騎居後賊望威軍爲高祖盡銳來戰威不能支軍遂敗高祖以騎翼擊之爲賊所掩

重圍數匝於是身先力戰會太宗來救因復收兵擊之賊遂大敗虜男女數萬口未幾突厥寇馬邑高祖遣高君雅拒之君雅頗憂罪譴高祖亦懼煬帝節度隋師不捷時太宗從在軍中知隋祚將亡潛圖爲義舉欲以安天下因進白曰大人何憂之甚也當今主上無道百姓愁怨城門之外皆已爲賊獨守小節必旦暮死亡若起義兵實當民欲人人之願此天授之機可因轉禍以就功業旣天與不取憂之何益高祖大驚深拒之太宗趨而出明日復進說曰此爲萬全之策以救族滅之事今王綱弛紊盜賊徧天下大人



受命討捕其可盡乎賊既不盡自當獲罪且又世傳李氏姓應圖錄李金才位望隆貴一朝族滅大人就能平賊卽有功當不賞以此求活可恃乎高祖意少解曰我日夜思量汝言大有理破家滅身亦繇汝化家爲國亦繇汝繇是定計遇煬帝遣使者馳拘高祖送詣江都高祖素被猜忌及是大懼謂太宗曰事急矣計將安出太宗又進策高祖然之方令太宗舉兵以自濟會有詔釋高祖繇是止旣而馬邑人劉武周殺刺史王仁恭舉兵反攻破汾陽宮百姓饑饉江都阻絕於是太宗復固請曰大人受委鎮守而賊徒日

熾竊思旣離宮闕不能捍禦若不早舉大計卽身陷禍機悔無所及高祖從之因集將帥而謂之曰武周僭號天子在遠賊據汾陽宮我輩不能制自當族滅矣將如之何王威與高君雅及諸僚吏咸請集兵高祖欲觀威等之意乃曰朝廷出師皆稟詔勅未有聞外敢專之者今賊據離宮自稱尊號近在數百里間江都懸隔道路艱阻若待奏報還期未測夫以薪救火豈有撲滅者哉今進退維谷復將何計威等咸曰公地居賢戚務盡丹誠國家之利唯在平賊逡巡聽奏豈及事機高祖曰善乃命太宗與晉陽令劉文靜



冊府元龜 創業三  
及門下客長孫順德劉弘基等各募兵旬日之間衆  
且一萬文靜頓於興國寺順德頓於阿育王寺威及  
君雅等見兵大集相與疑懼請高祖祈雨於晉祠將  
爲不利高祖知其謀部勒麾下陰爲之備五月甲子  
旦高祖與威及君雅等同坐視事太宗嚴兵在外以  
備非嘗遣劉文靜與高陽府司馬劉政會入告變云  
二人謀反陰引突厥將覆太原高祖佯驚曰豈有是  
耶徐以文書示之曰人告公反宜受勘當卽於座上  
執之丙寅突厥數萬騎來寇城下高祖令開門偃旗  
幟虜不測所爲引兵掠城外而去高祖令軍中曰

言王威勾賊此其効矣於是斬威君雅以謝太原百  
姓乃遣劉文靜連和於突厥六月己卯裴寂殷開山  
等請稱義兵准伊尹放太甲霍光廢昌邑故事尊煬  
帝爲太上皇立代王以安隋室傳檄諸郡以彰義舉  
高祖可之甲辰命太宗將兵徇西河郡下之癸巳建  
大將軍府以裴寂爲長史劉文靜爲司馬具設官屬  
始置三軍分爲左右以公子建成爲隴西公左領大  
都督左三軍悉隸焉命太宗爲燉煌公右領大都督  
右三軍悉隸焉開倉庫以賑窮乏遠近響應七月壬  
子以公子元吉爲姑臧公太原留守高祖以兵西圍



關中精甲三萬高祖仗白旗誓衆於太原之野引師  
卽路甲寅遣將張淪狗稽胡下離石隴泉文城三郡  
丙辰師次霍邑隋虎牙郎將宋老生陳兵拒險義師  
不得進屯軍於賈胡堡會霖雨積旬餽運不給高祖  
患之忽有白衣老父詣軍門請見曰予霍山神遣語  
大唐皇帝若向霍山邑當東南傍山取路八日雨止  
我當助爾破之高祖初哂之遣人東南視地界有微  
道高祖笑曰此神不欺趙襄子豈當負吾邪時有訛  
言云突厥將襲太原又軍糧盡高祖命旋師太宗切  
諫乃止八月己卯雨果霽高祖大悅以太牢祭霍山

辛巳引師從傍山道趨霍邑去城十餘里有陣雲起  
軍北東西竟天高祖謂裴寂曰雲色如此必當有慶  
又謂諸將曰老生若嬰城自守當卽攻之主客勢懸  
卒難致力其計若何太宗進曰老生勇而無謀請以  
輕兵挑之必出戰則成擒矣高祖從之太宗以數騎  
指其城下舉鞭指麾若將圍城者老生果怒開城門  
出太宗馳白高祖曰事諧矣高祖因謂隴西公建成  
曰汝看兩陣將交引左軍直趨東門命太宗引右軍  
直趨南門以斷其歸路老生之軍背城而陣高祖以  
中軍與建成合陣於城東太宗及柴紹陣於城南老



生麾兵疾進先薄高祖而建成墜馬老生乘之中軍與左軍却太宗自南原遙見塵起知義師退率二百騎馳下峻坂殺一賊遂橫斷其軍出陣後表裏齊譟響若摧山隋師大潰各捨仗而走懸門發老生不得入城乃棄馬投塹甲士斬之致其首於麾下流血數里僵屍相枕四面乘勝進薄其城時無攻具士卒緣稍而上一時攀堞無敢當者遂平霍邑撫其餘衆而用之丙戌下臨汾郡時臨汾郡通守陳叔達堅守不下高祖謂厨人曰吾明日下城然後朝膳辛卯引兵攻城自旦及辰而破高祖乃食癸巳次龍門縣突厥

始畢可汗遣康稍利率兵五百人馬二千匹以會於軍所九月巳亥營於孤窟去河東六十里先是春夏旱麥不熟穀米踊貴人相食及義師起澍雨應時至是大熟禾稼蒲野義兵資之無所匱乏論者以爲天贊時津梁爲其所斷關中向義者頗以爲阻於是水濱居人競進船不謀而至者前後數百里乃置水軍焉壬寅馮翊賊帥孫華土門賊帥白玄度率其衆來降高祖命華及王長諧等引兵先渡因戒之曰屈突通去此五十餘里不敢與我爭鋒其人守法懼罪必當伺便襲卿可宜爲之備通果遣虎牙郎將辛顯和



率精兵數千夜襲長諧義軍不利隋人逐北華將走  
太宗以遊騎掩其後顯和敗績僅以身免悉虜其衆  
丙辰馮翊太守蕭造以郡來降戊午高祖率衆攻屈  
突通於河東士卒登城南面者已千餘人高祖在東  
原望之而不見會雨暴至鳴角止軍繇是不尅或勸  
遂攻之高祖曰屈突通習兵而無勇若決戰非其所  
長嬰城難以必勝此自守虜耳不足爲虞遂守軍營  
於河渚文武將吏勸領大尉加置僚佐高祖從之華  
陰令李孝嘗以永豐倉歸義以少牢祀河率大軍而  
濟甲子舍於長春宮三秦士庶至者有萬數高祖禮

之竝過所望人人喜悅更相謂曰真吾主也丙寅遣  
隴西公建成司馬劉文靜屯永豐倉以拒潼關太宗  
以前軍數萬人自渭北徇三輔所至皆下高祖第三  
女柴氏從父弟神道舉義於司竹至是以兵來會鄒  
賊帥丘師利李仲文盩厔賊帥何潘仁向善志宜君  
賊帥劉旻等各率衆數千來降丁卯以師渡渭川畧  
定鄜杜至於盩厔庚午高祖觀永豐倉笑謂官屬曰  
吾千里遠來志在此耳旣爲我有復何憂哉於是開  
倉大賑窮乏壬申過馮翊舊宅饗五廟乙亥命太宗  
率兵自渭汭屯阿城隴西公建成自新豐趨上灊是



日延安上郡雕陰郡並遣使來降丙子高祖率大軍  
自下邳西上經煬帝行宮園苑悉罷之宮女放還親  
屬十月辛巳高祖至長樂宮時京師留守衛文昇陰  
世師挾代王以拒義師高祖屯兵春明門有衆二十  
餘萬遣使至城下諭以興復之意再三皆不報將吏  
固請圍城辛卯太宗帥師入郭頓于城西乃命隴西  
公建成入頓城東分朱雀大街刻營圍之甲辰諸將  
又請攻城高祖不許將吏進諫曰大軍西入本欲鎮  
撫關中輔翼隋室光崇帝業陰世師等違拒義師誑  
惑城內若不盡銳取城誅君側之賊何以息於流謗

高祖乃從之遂下令曰七廟及代王隋室公族並不  
得犯有違者罪及三族十一月丙辰軍頭雷紹先登  
守陴者分散京師平先命王符郎宋公弼叔隋圖籍  
戊午以右衛將軍陰世師多贖貨京兆郡丞滑儀性  
苛酷有害於政竝斬之以謝關中連坐者十餘人癸  
亥率百僚備法駕尊代王爲天子大赦改元義寧元  
年十一月甲子高祖自長樂宮入京師至朝堂望闕  
而拜天子以高祖爲丞相錄尚書事假黃鉞進封唐  
王以武德殿爲相府萬幾悉委焉高祖每日於廣化  
門視事乙丑榆林靈武五原平涼安定五郡遣使來



冊府元龜 創業二  
降十二月癸未天子詔以隴西公建成爲唐國長子  
進封太宗爲秦國公元吉爲齊國公高祖遣趙郡公  
李孝恭徇山南所至皆下乙未平涼太守張隆以其  
衆來降丁酉扶風太守竇璡阿池太守蕭瑀竝以郡  
來降癸卯右翊衛長史宋遵貴以陝縣太原倉來降  
甲辰遣使者詹俊李袞等徇巴蜀竝下之二年正月  
丁未天子詔高祖劔履上殿入朝不趨贊拜不名加  
前後羽葆鼓吹并依舊事辟仕癸丑遣楊義弘徇靈  
武戊午上維浙楊二郡及浮靈賊帥蕭岳周洮等竝  
遣使來降癸亥論功行賞其登京城第一勲授光祿

大夫開國郡公物一千段雖第一勲而身死者亦准  
此其官廼授於子第宅奴婢仍並量給第二勲人各  
授三輔物二百段第三勲人從朝散加戊辰以長子  
建成爲撫軍大將軍左元帥摠兵十餘萬以徇東郡  
二月丁丑遣功曹參軍裴清率兵襲河陽巳卯遣太  
嘗卿鄭元璿定樊鄧使者馬元規徇荆襄甲午出米  
七萬斛以賑貧人清河賊帥竇建德稱長樂王三月  
巳酉以齊國公元吉爲鎮北將軍太原道行軍元帥  
乙卯徙太宗爲趙國公戊辰詔唐王備九錫之禮五  
月乙巳朔詔唐王冕有十二旒建天子旌旗出警入



蹕乘金根車駕六馬備五時副車置旄頭雲罕樂舞  
八佾設鐘磬宮懸王后王子王女爵命之號一遵舊  
典五月遂受隋禪

後唐太祖武皇帝獻祖第三子

獻祖以上事具帝王帝系門

少為

雲中守捉使唐僖宗乾符三年段文楚為代北水陸  
發運雲州防禦使時歲薦饑文楚稍削軍食諸軍咸  
怨帝部下爭訴以軍食不克邊較程懷素王行審蓋  
寓李存璋薛鐵山康君立等即擁帝入雲州眾且萬  
人營於鬪雞臺城中械文楚出以應於外諸將列狀  
以聞請授帝旌鉞朝廷不允徵諸道兵以討之五年

黃巢渡江其勢滋蔓天子乃悟其事以帝為大同軍  
節度使簡較工部尚書是歲獻祖以振武軍節度使  
出師討黨項會吐渾赫連鐸乘虛陷振武舉族為吐  
渾所虜帝至定邊軍迎獻祖歸雲州雲州守將拒關  
不納帝掠蔚朔之地得三千人屯神武川之新城赫  
連鐸晝夜攻圍帝昆弟三人四面應賊俄而獻祖自  
蔚州引軍至吐渾退走自是軍勢復振天子以赫連  
鐸為大同軍節度使進軍以討六年春又以昭義節  
度使李鈞充北面招討使將上黨太原之師過石鎮  
關屯於代州與幽州李可舉會赫連鐸同攻蔚州獻



州府元龜 創業三  
祖以一軍禦之帝以一軍南抵遮虜城以拒李鈞鈞  
中流矢而卒廣明元年春天子復命元帥李涿率兵  
數萬屯代州獻祖戰不利乃率其族奔於鞑靫部是  
歲十一月黃巢寇潼關天子令河東監將陳思景爲  
代北起軍使收兵破賊十二月黃巢犯長安僖宗幸  
蜀思景與李友金發沙陀諸部五千騎南赴京師友  
金卽帝之族父也中和元年二月友金軍至絳州將  
渡河刺史瞿積謂陳思景曰巢賊方盛不如且還代  
北徐圖利害四月友金軍鴈門瞿積至代州半月之  
間募兵三萬營於崞縣之西其軍皆北邊五部之衆

不開軍法瞿積友金不能制友金謂景思曰舉大衆  
成大事當威明素著則可以服人今軍雖數萬苟無  
善帥進亦無功吾兄李司徒父子去歲於國家獲罪  
今寄北郡雄武之畧爲衆所推若驃騎急奏召還代  
北之人一麾響應則妖賊可平也景思然之促奏行  
在天子乃以帝爲鴈門節度使仍令以本軍討賊友  
金發五百騎賞詔召帝於達靫帝卽率達靫諸部趨  
鴈門五月整兵二萬南嚮京師太原鄭從讜以兵守  
石嶺關帝乃引軍出他道至太原城會大雨班師於  
鴈門二年十月帝率忻代蔚朔達靫之軍三萬五千



冊月 卷之三  
騎赴難於京師十二月至河中三年正月諸道都統  
王鐸承制授帝東北面行營都統帝令弟克修領前  
鋒五百騎渡河視賊黃巢遣將米重威賚重賂及僞  
詔以奉帝帝納其賂以給諸將燔其僞詔以兵自夏  
陽濟河二月營於乾坑店黃巢大將尚讓林言王璠  
趙璋等引軍十五萬屯於梁田坡翌日大軍合戰白  
午及晡巢賊大敗是夜賊衆遁據華州帝進軍圍之  
巢弟黃鄴黃揆固守三月尚讓引大軍赴援帝率兵  
萬餘逆戰於零口巢軍大敗帝進軍滑橋翌日黃揆  
棄華州而遁四月黃巢燔長安收其餘衆東走藍田

關帝進收京師七月天子授帝金紫光祿大夫簡較  
左僕射河東節度使時年二十有八十一月平潞州  
表其弟克修爲昭義軍節度使潞帥孟方立退保於  
邢州十二月許帥田從異汴帥朱溫徐帥時溥陳州  
刺史趙犢各遣使來告以巢蔡合從兇鋒尚熾請帝  
共力討賊四年四月帝帥蕃漢之師萬五千合徐汴  
之師破尚讓於太康斬獲萬計進攻賊於西華賊將  
黃鄴棄營而遁帝引軍營於中牟大破賊於王滿渡  
巢賊大至濟汴而北帝渡汴遇賊將渡而南半濟擊  
之大敗殘衆保於胙縣寇旬大軍躡之黃巢乃攜妻



子兄弟千餘人東走帝追賊至於曹州還至汴汴帥朱溫館於上源驛夜將圖之帝縋城而出

事具帝王神助門

光啓二年三月幽州李可舉鎮州王景崇連兵寇定州節度使王處存求援於帝帝遣大將廉君立安老薛可敦啜率兵赴之五月鎮人攻無極帝親領兵救之鎮人退保新城武皇攻之斬首萬餘級獲馬千疋王處存亦敗燕軍於易州十一月河中王重榮遣使來乞師且言邠州朱玫鳳翔府李符將加兵於已初帝與汴人構怨前後八表請削奪汴帥官爵自以本軍進討天子累遣內臣楊復恭宣旨令且全大體

帝不時奉詔天子頗任汴帥時觀軍容使田令孜君側擅權惡王重榮與帝膠固將離其勢乃移重榮於定州重榮告於帝帝上章言李符朱玫挾邪忌正黨庇朱溫臣已黜簡蕃漢軍五萬取來年渡河先斬朱玫李符然後平盪朱溫天子覽表遣使譬喻百端輒傳相望旣而朱玫引邠鳳之師攻河中王重榮出師拒戰朱玫於沙苑對壘月餘十二月帝引軍渡河與朱玫決戰玫大敗收軍夜遁入於京師時京城大駭天子幸鳳翔帝退軍於河中二年正月僖宗南幸興元朱玫於鳳翔立嗣襄王熿爲帝以僞詔賜帝帝燔



之械其使馳檄諸方鎮遣使奉表於行在九月遣昭義節度李克修討孟方立於邢州大敗方立之衆於焦岡斬首數千級以大將安金俊爲邢州刺史以撫其降人十月進攻邢州邢人出戰又敗之三年六月河中節度使王重榮爲部將嘗行儒所殺帝表重榮兄重盈爲帥文德元年二月僖宗自興元還京三月昭宗卽位以帝爲開府儀同三司簡較太師兼侍中隴西郡王十月邢州孟方立遣奚忠信將兵三萬寇遼州帝大破之斬首萬級大順元年遣李存孝攻邢州孟遷以邢洛磁三州降執汴將王虔裕三百人以

獻帝徙孟遷於太原以安金俊爲邢洛團練使二月帝攻雲州拔其東城赫連鐸求援於燕燕帥李康威將兵三萬以赴之戰於城下燕軍大敗康威與雲州赫連鐸及汴帥協謀連上表請加兵於帝六月天子削奪帝官爵以宰相張濬爲招討使以京兆尹孫揆爲副華州韓建爲行營都虞候以汴帥爲河東東面招討使李康威河東北面招討使赫連鐸爲副汴將朱友裕將兵屯晉絳時汴軍已據潞州又遣大將李讜等率軍數萬急攻澤州帝遣李存孝自潞州將三千騎以援之汴將鄧季筠以一軍犯陣存孝進擊擒



其都將十數人獲馬千餘匹是夜李讜收軍而退大軍掩擊至馬牢關斬首萬餘級追襲至懷州而還存孝復引軍攻潞州九月汴將葛從周棄潞州而遁帝以康君立爲潞州節度使十月張濬之師入晉州游軍至汾隰帝遣薛鐵山李承嗣將騎三千出陰地關營於洪洞遣李存孝將兵五千營於趙城華州韓建以壯士三百人宵犯存孝之營存孝追擊直壓晉州西門張濬之師出戰爲存孝所敗自是閉壁不出存孝引軍攻絳州十二月晉州刺史張行恭棄城而奔韓建張濬繇舍山路遁去二年正月帝上章申理其

畧曰臣今身無官爵名是罪人不敢歸陛下藩方且欲於河中寄寓進退行止伏候聖裁天子尋就加守中書令是月魏博爲汴將葛從周所寇節度使羅弘信遣使來求援帝出師以赴之三月邢州節度使安知建叛奔青州天子以知建爲神武統軍自棣州沂河歸朝鄆州朱瑄邀斬於河上傳首晉陽以李存孝爲邢州節度使四月帝大舉兵討赫連鐸於雲州七月平之邢州節度使李存孝以鎮州王鎰託附汴人謀亂河朔北連燕寇請乘雲代之捷平定燕趙帝然之八月大蒐於晉陽遂南巡澤潞畧地懷孟河陽趙



克裕望風送款請脩鄰好九月蒐於邢州十月李存  
孝董前軍攻臨城鎮人五萬營於臨城西北龍尾岡  
帝令李存審存質以步軍攻之鎮人大敗殺獲萬計  
拔臨城進攻元氏幽州李康威以步騎五萬營於鄆  
邑以援鎮州帝分兵大掠旋軍邢州景福元年正月  
鎮州王鎔恃燕人之援率兵十餘萬攻邢州之堯山  
帝遣李存信李嗣勳李存審將兵援之大破燕趙之  
衆斬首二萬收其軍實三月帝進軍渡滹沱攻藥城  
下鼓城橐城八月赫連鐸誘幽州李康威之衆八萬  
寇天成軍遂攻雲州營於州北連亘數里帝潛軍入

於雲州詰旦出騎軍以擊斬獲數萬李康威燒營而  
遁乾寧元年十二月帝攻媯州壬子燕兵復合人居  
庸關拒戰帝命精騎以疲之令步將李存審繇他道  
擊之自午至晡燕軍復敗李儔携其族棄城而遁將  
之滄州隨行輜車臧獲妓妾甚衆滄帥盧彥威利其  
貨以兵攻儔於景城殺之盡虜其衆丙辰進軍幽州  
其守城大將請降帝令李存審與劉文恭入城撫勞  
三年六月表三帥之罪復移檄三鎮三鎮太懼是月  
次絳州刺史王瑤登陴拒命帝攻之旬日而拔斬瑤  
於軍門誅其黨千餘人七月次河中王珂迎謁於路



同州節度使王行約棄城奔京師右軍指揮使李繼  
鵬茂貞假子也劫天子幸鳳翔左軍指揮使王行實  
行瑜弟也劫天子幸邠州又行瑜茂貞聲音自來迎  
駕天子遂幸南山駐蹕於蒗城帝遣判官王環奉表  
奔問天子遣使賜詔令與王珂討邠鳳時帝方攻華  
州俄聞李茂貞領兵三萬至盩厔王行瑜領兵至興  
平欲往石門迎駕乃解華州之圍進營渭橋天子遣  
延王戒及丹王允賚詔促兵直抵邠鳳八月帝進營  
渭北遣史儼將三千騎往石門扈駕遣李存信李存  
審會鄜延之兵攻行瑜之梨園寨天子削奪行瑜官

爵以帝爲天下兵馬都招討天子還宮加帝守太師  
中書令邠寧四面行營都統時王行瑜弟兄固守梨  
園寨帝攻之甚急又表李罕之爲副都統十月李存  
信於梨園寨北遇賊軍斬首千餘級自是賊閉壁不  
出帝令李罕之晝夜急攻賊軍乏食拔營而去李存  
信與罕之等先伏軍於阨路俟賊軍至縱軍擊之殺  
戮萬計是日收梨園等三寨生擒行瑜之子知進并  
母丘氏大將李元福等二百人送赴闕庭十一月收  
龍泉寨時行瑜以精甲五千守之李茂貞出兵來援  
爲李罕之所敗邠賊遂棄龍泉寨而去行瑜復入邠



州大軍進逼其城行瑜棄城而遁帝收其城封府庫  
 遂以捷聞既而慶州奏王行瑜將家屬五百人到州  
 界為部下所殺傳首闕下帝既平行瑜還軍渭北十  
 二月天子賜號忠貞平難功臣進封晉王加實封二  
 百戶帝復上表請討李茂貞天子不允遂班師光化  
 元年正月鳳翔李茂貞華州韓建皆致書於帝乞脩  
 和好同獎王室兼乞助丁匠脩繕秦宮帝許之四月  
 汴將葛從周寇邢洛磁等州旬日之內三州連陷二  
 年三月從周自上門陷承天軍又陷遼州三年十月  
 遣李嗣昭率步騎三萬攻懷州下之天復元年正月

汴將張存敬攻陷晉絳二州三月汴師自大梁至河  
 中王珂出迎天子以汴帥兼鎮河中帝自是不復能  
 援京師霸業中否天祐三年九月遣周德威李嗣昭  
 合燕軍三萬以攻澤潞十二月潞州節度使丁會開  
 門迎降四年四月哀帝禪位於汴帥五月梁祖遣其  
 將康懷英率兵十萬圍潞州築壘環城帝遣周德威  
 將兵赴援梁祖以懷英無功乃以李思安代之是歲  
 西川王建遣吏至勸帝各王一方俟破賊之後訪唐  
 朝宗室以嗣帝位然後各歸藩守帝不從

以書報之  
日竊念本

朝屯否巨葉淪胥攀鼎駕以長違撫形弓而自咎默  
 默終古悠悠蒼生遘此厲階永為痛毒視橫流而莫



救徒誓楫以興言別捧函題過垂獎論省覽周既駭  
 惕異嘗淚下霑衿倍爵申胥之素汗流浹背如聞蔣  
 濟之言僕經事兩朝受恩三代位叨將相籍係宗枝  
 賜鈇鉞以專征徵包茅而問罪鑿兵接戰二十餘年  
 竟未能斬新莽之頭顱斷蚩尤之肩髀以至廟朝顛  
 覆豺虎縱橫且受任分憂叨榮冒寵龜玉毀積誰之  
 咎歟備閭指陳不勝慙慙然則君臣無嘗位陵谷有  
 變遷或箠塞長河泥封函谷時移事改理有萬殊卽  
 如周末虎爭魏初昂據孫權父子不顯授於漢恩劉  
 備君臣自微興於涿郡得之不謀於家世失之無損  
 於功名適當逐鹿之秋可斬華蟲之服唯僕累朝席  
 寵奕世輸忠忝佩訓詞粗存家法善博奕者唯先守  
 道治蹊田者不可奪牛誓於此生靡敢失節仰憑廟  
 勝蚤殄寇讐如其事與願違則共滅洪遊於地亦  
 無恨矣唯公社稷元勳華嵩降祉鎮九州之上地負  
 一代之宏才合於此時自求多福所承良訊非僕深  
 心天下其謂我何有國非吾  
 節也悽悽孤懇此不盡陳

號曰武皇帝廟曰太祖  
 冊府元龜



